

Museo Arqueologico Aruba lo ricibi obhetonan for di Rijksmuseum Volkenkunde

STA. CRUZ -- Un grato noticia a yega Museo Arqueologico Aruba recientemente y a haya cobertura den medionan di comunicacion Hulandes den e ultimo dianan. Como parti di e trabao cu Museo Arqueologico ta desplegando pa instala y habri su exposicion nobo na Schelpstraat lo ricibi 5 obheto proveniente di Aruba, di e asina yama coleccion di ‘Pater Van Koolwijk’ cualnan tin mas di 100 aña na Hulanda. Museo Arqueologico a acerca e museo Hulandes, ya for di aña pasa y a cumpli cu e requisitonan inicial pa obtene e aprobacion pa haya obhetonan den ‘bruikleen’

pa un periodo minimo di 5 aña. Ta trata di tres calbas (periodo Historico) y dos obheto di ceramica (periodo Ceramico). Awor tin di cumpli cu otro requisitonan pa trece y instala e obhetonan den e compleho nobo di Museo Arqueologico. Mas cu claro Museo Arqueologico ta sumamente contento di por colabora y haya e confianza di un institucion renombra manera ‘Rijksmuseum Volkenkunde’ pa por ricibi, presenta y cuida e obhetonan di Aruba. Esakinan a haya un valor universal na Hulanda caminda a cuida nan como herencia cultural. Fin di Oktober venidero

lo duna un presentacion extenso di tur locual ta trata e trabaonan pa traha y instala e exposicion nobo di Museo Arqueologico y lo mustra material grafico di tur e obhetonan aki y di e exposicion cu lo ta planea pa ser instala fin di aña. E proyecto pa un ubicacion nobo pa presenta y cuida nos herencia arqueologico ta ser financia pa Union Europeo, Gobierno di Aruba y UNOCA. E proyecto ta conta cu un gran sosten di hopi sector di comunidad di cual un resultado ta sigur e logro di haya parti di nos herencia bek na Aruba y tuma e reto pa mustra cu nos por cuid’e y apreci’e.

